

Sanin Daou vocero di Arubus N.V.

Meternan di parkeer muy pronto lo wordo instala

ORANJESTAD - E prome meternan parkeer a yega Aruba pa cual aki vocero di Arubus N.V. sr. Sanin Daou a reacciona riba esaki. Aki algun dia tur hende lo por mira cu e mashinnan di parkeer meter lo cuminsa wordo instala den centro.

Sr. Daou a indica cu ley a pasa y awor cosnan cuminsa move hopi mas lihe. E prome grupo di mashinnan di meter di parkeer tin basta tempo caba na Aruba. E di dos grupo di e mashin aki ta yegando caba, di cual dentro di poco nan lo ta den poder di Arubus. Na e momentonan aki Arubus ta pushando pa tur cos keda cla mas lihe y cuminsa traha, segun e vocero.

E base di concret pa e meternan di parkeer ya caba a wordo poni, segun sr. Daou. Desde algun tempo caba tra-



bounan pa instala e base di concret tabata tumando luga. Asina cu tur e basenan y tur detaye cu falta keda cla, e mashinnan lo wordo instala. Den e area di playa lo tin mas o menos 30 pa 40 meter di parkeer, segun e vocero. "Mester bisa cu e mashinnan aki no ta un mashin pa auto, sino cada mashin ta regula algun auto," e ta indica. "Si mi no ta hera dies auto cada

mashin ta regula. Kiermen bo tin un mashin cu ta traha pa dies auto."

Ta uza placa cash y smartcard

Un di e preguntanan cu hopi hende lo cuminsa haci ta con e mashin di meter di parkeer lo traha, sea cu un banco-matico, placa cash of cu un carchi. Pero tambe e cantidad cu esaki lo cobra ora cu un hende para su auto. "E ta bay uza un sistema di smartcard y tambe cash. Nos ta bay haci e mashin un combinacion di carchi y placa cash, mescos cu nos sistema di bus ta uza smartcard," segun sr. Daou. Esaki ta nifica cu esunnan cu tin un smartcard por swipe e carchi ora cu nan para nan auto, pero esunnan cu no tin e carchi di mashin por paga cash.

Uza sistema di smartcard



E smartcard cu ta wordo uza na e momentonan aki pa bus, nan ta purbando di mira si esaki lo ta posibel cu e carchinan aki lo por traha riba e mashinnan aki. Si nan logra cu e smartcard ta traha riba e mashinnan aki, Arubus lo laga comunidad sa asina cu nan ta mas sigur. Un cos ta cu nan ta sigur cu lo haci uzo di un sistema di smartcard cu ta traha cu e meter di parkeer, pero tambe nan ta purbando di integra nan hunto, segun sr. Daou.

Pa bin cu e meter di parkeer, tin un plan. E prome fase di e proyecto aki ta full playa, incluyendo dilanti di Parlamento. Segun sr. Daou, e di dos fase di e proyecto lo ta e area di hotel. Ainda sr. Daou no tin un fecha exacto pa cuminsa instala e meternan di parkeer, pero e ta prefera di haya e informacion mas

concreto pa por bisa un fecha. Loke cu si e sa ta cu e ultimo detayenan mester wordo regla pa asina nan por cuminsa. "Mi ta prefera di tin un fecha mas sigur pa mi por bisa esaki," e ta bisa.

Manera cu e mashinnan cuminsa wordo instala, mes ora e controladonan di e mashinnan aki lo subi caya. "Mi mester bisa si cu diferente biaha nan riba caya caba. Manera hende a wak caba, nan tabata saca diferente rapport pa nos, wak con e ocupacion ta durante dia, wak con e autonan ta move pa nos tin un tiki di e comportacion di automobilistanan y con nan ta parkeer. Ya caba nan a subi caya diferente biaha caba, cu nos tin un idea con esaki ta hinca den otro," segun e vocero di Arubus. □

